

Akiliut atorlugu aningaasartuutit, ilassinninnermut aningaasartuutit kiisalu angalanermut aningaasartuutit ilassutitallit Naalakkersuisutut sulinnermut atatillugu aningaasartuutit qaammatit pingasukkaarlugit tamanut takusassiarisalnissaat anguniarlugu Naalakkersuisut siunnersuusioqqullugit peqquneqarnissaannik Inatsisartut aalajangiiffigisassaattut siunnersuut. Siunnersuut saqqummiunneqassaaq UPA2020-mi.
(Inatsisartunut ilaasortaq Tillie Martinussen, Suleqatigiissitsisut)

Akissuteqaat

(Aningaasaqarnermut Nunanilu Avannarlerni suleqatigiinnermut Naalakkersuisoq)

Siullermeerinnineq

Suleqatigiissitsisunit Tillie Martinussen aalajangiiffigisassatut siunnersuummik saqqummiussineranut Naalakkersuisut sinnerlugit qutsavigaara.

Pisortat ingerlatsineranni ilaatigut innuttaasut akileraarutaannik atuineq pineqartillugu ammasuunissaq ersarissuunissarlu pingaaruteqarmat Naalakkersuisut isumaqatigaat. Naalakkersuisutut atuuffik tatigisaalluni suliffiummat aammalu pisortat aningaasaataannik atuineq pillugu ammasuunissamik naatsorsuutiginnittoqarmat qularutigineqassanngilaq.

Suliamut tunngatillugu kikkulluunniit ullumikkut takunnissinnaatitaareermata ilisimassallugu pingaaruteqarpoq. Taamaalillunilu malittarisassat atuuttut malillugit Naalakkersuisut aningaasanik atuinernannik paasisaqarnissamut takunninnissamullu pitsaasunik periarfissaqareerpoq. Suliamut tunngatillugu takunnissinnaatitaanermik qinnuteqaatinik taamaattunik Naalakkersuisut akuttunngitsumik tigusaqartarlutillu akuersissuteqartarput.

Taamaakkaluartoq siunnersuummi pingaarnertut siunertarineqartut Naalakkersuisunit iluarisimaarneqarput. Paasissutissat qanoq ittut saqqummiunneqassanersut, piffissami qanoq sivisutigisumi pissarsiarineqarsinnaasassanersut, tamanut saqqummiussinnginnermi qanoq isumannaallisaasoqartassanersoq kiisalu qanoq akulikitsigisumik saqqummiunneqartassanersut qulaajarneqaaqartariaqartoq nunani allani aqqissuussinernik assingusunik misissuinerit takutippaat.

Pappialat tamanut saqqummiunneqartussat nakkutillivigineqarnissaat aqqissuivigineqarnissaallu pisariaqassaaq, taamaalilluni pappialanut atatillugu assersuutigalugu inunnik paasissutissat pillugit inatsit malinneqarsinnaaqqullugu aammalu taamaalilluni isumannaallisaanermi mianerisassat attuumassuteqartut isumagineqarsinnaaqqullugit.

Allatut oqaatigalugu aqqissuussinertut siunnersuutigineqartoq sulisunik aningaasanillu atuiffiusariaqassasoq Naalakkersuisunit ilimagineqarpoq.

Naalakkersuisut atuinernanni ilanngussanik inatsit atuuttoq aqutigalugu takunninnissamut periarfissaqareerpoq, soorluttaaq missingersuutit pillugit Naalakkersuisut nittartagaatigut tamanut saqqummiunneqarlutik nalinginnaasumik ilisimatitsissuteqartarnerit naapertorlugit Naalakkersuisut aningaasaliissutinik atuinerat pillugu piffissakkuutaartumik nalunaarusiortarnissaq Inatsisartut inatsisaatigut ullumikkut qulakkeerneqareersoq.

Taamaattumillu aalajangiiffigisassatut siunnersuummi aaqqissuussineq siunnersuutigineqartoq Naalakkersuisut aningaasaliissutinik isumatusaartumik atuinerannut annertunerusumik ersarinnerulersitsinavianngitsoq Naalakkersuisut ataatsimut isigalugu isumaqarput. Akerlianilli ataatsimut isigalugu suliap tamatuma ingerlanneqarnera akisunerulersissallugu.

Siunnersuut ataatsimiititaliami suliarineqartussatut innersuunneqassappat ajornartorsiutit siuliani taaneqartut ataatsimiititaliap isumaliutissiissusiornermini isumaliutigissagai Naalakkersuisunit inussiarnersumik siunnersuutigineqarpoq. Tamatuma peqatigisaanik siunnersuummi matumani pineqartumi anguniakkamut assingumik anguniagassartaqarluni aalajangiiffigisassatut siunnersuut, UKA2018/107 Inatsisartut ataatsimiinneranni matumani aamma oqaluuserineqassammat Naalakkersuisunit erseqqissaatigineqassaaq.

Taama oqaaseqarlunga aalajangiiffigisassatut siunnersuut itigartinneqassasoq Naalakkersuisut sinnerlugit inassutigaara.